

度
支
奏
議

度支奏議目錄

雲南司三卷

題請十一十二月支放通糧疏

題覆宋倉院蠲免通倉腳價疏

漕糧就近收欵以防虜患疏

題請收欵凍阻邊糧疏

題覆毛御史運糧急着疏

題正月分月糧仍放京倉疏

搬運沿河凍糴以保萬全疏

題報收欽運過凍糧疏

題請大集車畜起運凍糧疏

覆總督倉場官買剩糧本折兼支疏

題覆收入津城凍糧起運入京疏

題京軍二月分支放通糧疏

題覆總漕料理新運挽遲爲速疏

亟催輕賁以救然眉疏

題覆總漕薦劾漕運官員疏

題報通廳務關燒燬剥船漕糧疏

題議速行水運兼寬民船疏

題覆巡漕分委押運漕糧疏

題京營二月草料照新議給折色疏

題覆總漕補造漕船以濟新運疏

題報龔漕院原疏關會稽遲疏

唐支奏議卷之三

太子少保戶部尚書淄青畢自嚴視草

題前十一月支放通糧疏

題爲仰遵

祖制請明放糧月期以一政體以安軍心事雲南清
吏司案呈查得

祖宗建倉京通歲入歲出各有定額京管官軍月糧
每年舊例京倉以三五六八九十一月支放六
箇月通倉以正二七臘月支放四箇月四十兩

月支放折色後因月分不勻蒙本部前任尚書
李起元具題奉

旨改於二五八臘月在於通倉支放總之合一年四
箇月之數此歷來定例也今年八月分例該通
倉支放祇緣京倉粟米貯久恐有紅爛之虞蒙
本部議於八月改放京倉粟米而於九月補放
通倉一那移之間寓酌盈濟虛之意時有京營
總協衙門稱言九月當秋獮之候正京軍操練
之期赴通支糧有妨操務復將通倉改於十一

月支放雖經出示曉諭移文各該衙門知會今
查臘月又該通倉正放之期以此一連兩月俱
於通倉支領倘不預先具題欽奉

明旨誠恐軍心刁猾臨期復以寒沍爲詞紛紜稟擾
殊非政體今督部又咨稱上年前後通計凍糧
改貯通倉正米二十九萬餘石約足京軍兩月
之支應行下糧廳酌定月分派撥京軍赴領等
因此亦酌盈餘以抵京庾虧缺之數自是正論
第今歲時日有限不能加派以俟來春再爲酌

議總之通倉一年支放卽不能加於四箇月之外亦決不能減於四箇月之內矣相應一併題請案呈到部該臣等看得京通倉庾創自

祖制放糧月期定自

廟裁蓋漕糧入京倉者三分之二入通倉者三分之一是以京倉每年放六箇月通倉每年放四箇月此權其多寡酌其盈虛各欲三年而有一年之積若京倉入之數有限而出之額太浮非所以爲根本之計也若通倉入之如其數而出之

縮於額又非所以爲流通之法也今歲因京倉粟米貯久將八月改放京倉粟米而以九月補放通倉原屬妥當後因京營有妨操務之議故復議改通倉於十一月亦因天啓六年原有改放之例案卷俱存今該司恐軍心刁猾臨期借口此亦審處預防之計也相應題請

明旨以便臨期曉示安心支領無以疊月寒冷爲辭
更祈

天語申飭以後京軍支放京倉務照原定正三六七

九十一月爲準通倉務照原定二五八臘月爲
準四十兩月務放折色爲準永爲遵守毋相那
僭則

法令畫一旣無紛更改移之端而軍士帖服自無
鑽管誼擾之釁庶支領稱便而倉儲得平矣至
於督臣所議凍糧改通二十九萬派撥京軍赴
領一節仍俟來春再議旣經該司案呈前來相
應題

請恭候

下臣部移咨京營總協衙門一體欽遵施行

崇禎二年十月初十日具

題本月十四日奉

聖旨京軍疊放通糧原因前月通融那儻著預行曉諭以後京通本折應放月分各遵規制毋得紛更該衙門知道欽此

題覆宋倉院蠲免通倉脚價疏

題爲舊役積逋養癰新役代償悞運謹酌抵補之
議以甦苦役以重

國儲事雲南清吏司案呈崇禎二年八月二十二
日奉本部送戶科抄出巡按直隸監察御史宋
師襄題前事奉

聖旨運役苦累這奏運價抵扣事宜該部卽與議覆
欽此欽遵又奉本部批據通漕運役吳廷灼周
華李文光劉吉良塔三樂等連名告爲籲天垂

仁以挽頽漕以甦萬命事通送到司一併移會
坐糧廳郎中丁流芳細查各役透支積欠銀兩

孰爲舊欠孰爲新支作何議處去後隨據該廳
備將節年排造修艚置袋募夫等費舊例預支
庫銀於各役腳價內扣除分別舊欠新支各數
目造冊呈報前來復該本部再四駁查及移會
倉院從長酌議各回覆在案相應題覆案呈到
部該臣等看得通濟庫輕賞銀兩顯供全漕輸
輓之需一切排造修艚募夫置袋等費各役力

難預辦俱於輕費先爲支領如一年排造十年
勻扣一年大修五年勻扣其餘俱於腳價內當
年扣還上下通融彼此兩利立法者真可謂計
長久矣惟是頭緒頗多弊端易起積役利於透
支積書恣爲那移始未嘗非十年勻扣也究有
應扣不扣而立名爲寬扣停扣者亦有扣不盡
扣而托言不敷扣者種種情態繇來已久臣近
徹底清算往返駁查自萬曆四十五六年以至
於今有應勻扣銀一十五萬三千五十二兩三

錢七分零有天啓元年五年奉

旨停扣遠年積欠銀三萬二千四百五十八兩七錢七分零有天啓六七兩年不敷扣銀六萬六千二百七十二兩三錢八分零合此三項共計二十五萬一千七百餘兩沿習拖欠償無可償臣部當此三空四盡之時每切捉襟露肘之憂凡欠之

公家者自應還之 公家誰敢委之如逝波置之如泥沙而聽其化爲子虛烏有乎惟是各役數

噉亦自有說細查透支積欠之繇蓋起於萬曆三十八九年間漕糧凍阻陸運艱辛賠貲不堪扣補未完至四十六年以後奴賊猖獗津糧截留腳價愈少舊欠難敷天啓二年又值東妖梗阻一年之糧分作兩年之運終歲勤動無時息肩鼓棹層冰之中輓車積雪之上剗肉醫瘡寅食卯糧甚至桃僵李代以羊易牛透支權宜於一時積逋流毒於莫熄此巡倉御史宋師襄所爲目擊心傷有慨於衷而以抵扣之疏惻然爲

各役請命也業奉

天語煌煌軫恤貧苦臣等仰承

德意方幸從前積逋一朝可清斬斷葛藤無便於此
而何異同之有因查疏內各役助工三釐自萬
曆八年爲始每年扣解衙門支銷通糧廳應
有卷案可稽復據該廳回稱年深日久案卷湮
沒而所據以爲的者止就天啓元年本部前任
尚書汪應蛟題覆巡漕御史易應昌之疏今
原疏逐一詳玩內稱開河經紀腳價萬曆

減爲一分八釐蓋因通惠河成而工力較省其
修艙置袋諸費俱彙算以定例未見不足又車
戶因立水運而減三分之二脚價亦減三釐緣
船運視車運工力省也查軍白糧車戶皆已加
增一釐其開河經紀應照土壩車戶量增一釐
以蘇其困但未可定爲例耳車戶已增一釐似
難再增等因據此則各役扣減似原非爲助工
也說者或謂通惠河工成於嘉靖戊子之歲不
減於前而減於後是則稍存疑竇耳白糧船戶

與石土二壩船戶舊例每歲小修銀四兩
俱當年扣還至天啓元年議覆遂照河剡事例
於四兩五錢內減去二兩每歲官給二兩五錢
免扣是則有所減又有所增矣

大工裁省三釐之說原無確據卷案亦無扣存銀兩
而各役額請動以助工爲口實則承訛之過也
且腳價已量增一釐小修又官給銀兩扣者
未嘗盡扣抵者又安得全抵乎但

明旨以爲苦累則眞苦累也闔澤下究而

行是屯膏也各役旣勢窮而難返臣部豈膠柱而鼓瑟願易扣抵而請蠲免可乎蓋以爲抵則認爲應得臣不敢言也以爲蠲則

恩自上流臣竊有奢望焉伏查崇禎二年誕生

皇子

恩赦一款凡商匠車灰等役拖欠銀兩年遠人亡無從補償者俱准赦免而此積欠銀兩內有在

神廟時者亦皆從前積欠領銀者已登鬼錄効力者又皆赤貧且奉

旨曾經停扣夫前既可停則今亦可蠲矣伏望
皇上施破格之仁拯賠累之苦權衡年分之遠近及
各役積欠之多寡比照商匠

恩例於二十五萬餘兩內量蠲十萬甦其疲頓鼓其
勤勞值轉輸苦楚之際爲通融救弊之方亦運
事輓遲爲速之一機也查石土二壩及白糧船
戶三項遠年積欠銀三萬二千四百五十餘兩
曾經天啓元年巡漕易御史天啓五年巡漕練
御史題請停扣在案此斷當蠲免無疑者又石

土二壩及白糧船戶軍糧經紀四項共欠天啓
六七兩年不敷扣銀六萬六千二百七十餘兩
年歲未遠此斷當追扣無疑者惟關壩軍白糧
車戶經紀水脚十二項共欠萬曆四十五六年
來應扣未完銀十五萬三千五十餘兩內有舊
欠八萬八千二百六十七兩七錢零有新支六
萬四千七百八十餘兩除新支勾扣外其舊欠
者例得蠲免而難盡免相應找蠲六萬七千五
百四十餘兩共合蠲免十萬之數俾令各役通

霜

大弘一視之仁用免不均之嘆其應扣者尚有十萬
萬餘兩勾扣十年之內以崇禎二年爲始前五
年每年扣銀二萬兩後五年每年扣銀一萬兩
蓋將來歲月寢久則又有當扣者耳倉臣在漕
言漕急公熱腸謂非盡數捐抵不足甦貧役之
困原與先年巡漕二臣同一軌轍總爲
國家軍儲起見而臣鯁鯁過計真見透支病根原
不盡起助工恐後來者以積欠爲固然以累歲

爲得計而猶以助工錢糧爲應復履霜堅冰誠
漸不可長耳在倉臣言抵在臣部言蠲俱爲運
事計權宜應蠲者蠲以通其窮應扣者扣以防
其漸尤爲運事杜濫觴想倉臣亦亮臣部之苦
心矣雖然尤有說焉小人貪心無厭谿壑何窮
年來糧運數少而運價支領過多不先事而扣
除俟事後而算帳目前支領視爲應得之物一
責扣還猶如剗心挫膽而分毫難捨當其運事
匆忙若迫以不得不與之勢逮於扣追哀懇又

動以不得不緩之情苟不極其弊而防其流是
臣今日之

請蠲實誨之偷也夫安得無法而處此竊謂所當申
飭以善其後者有二一曰議支放請詳通庫錢
糧邇年自支自放臣部絕不與聞不知起自何
年此後支放各項銀兩務須查明顛末呈明臣
部及總督衙門劄行給發倘遇事情緊急不及
詳請亦須先行給發隨即報明寧使事浮於銀
勿使銀浮於事如津截既多則不得執舊額而

多索如勻扣未敷則不得滋停閣而多與仍照
新舊銀庫事例每月終將放過銀數揭報查考
事完彙冊銷算則支放扣除自覺清楚誠拔本
塞源之要訣也一日刻勻扣底冊勻扣之法從
來遠矣一切雜費預支於運價之內亦卽於運
價扣除先年事竣銷算卽將將來勻扣數目刊
刻成書昭然如農之有畔夫誰得而踰之自天
啓六七年當事巧於市恩吏書因而漁利相沿
者非一日經承者已屢更漫不經心莫可窮詰

於是透支不已因而那移那移不已流爲漏卮
揆其病根皆勾扣刻書以廢爲厲階耳請自
禎二年蠲免之後銷算明白將應勾扣銀兩查
照舊例刻布永爲定規仍如前溷淆者經管司
官臣執白簡繩之吏書拿問叅送法司追賊究
問庶按冊稽查完欠了然不得再立寬扣不敷
扣名色徼倖吞蝕於異日矣總之

國計民帑兩者並重民瘼方在剝膚旣勤其手足
未得不培其命脉

國用方當匱乏恐厭於私情又或有虧於

公帑臣固不敢壅遏

皇恩以妨轉漕之大計而又不敢隳敗

成法以滋耗蠹之隱憂此臣所爲反覆低迴不憚詳
慎酌議者也旣經倉臣具題及通糧聽覆數前
來相應覆

請恭候

命下臣部移文巡倉御史及總督倉場并坐糧廳一
體欽遵施行臣等無任皇悚待

命之至

崇禎二年十月二十三日具

題本月二十六日奉

聖旨追運價蠲扣俱依議善後二款仍與申飭行欽
此

漕糧就近收歛以防虜患疏

題爲漕舟阻凍進退無策敬陳就近收斂之法以
防虜患事雲南清吏司案呈奉本部送戶科抄
出該總督倉場南居益題爲緊急夷情事奉

聖旨這露積凍糧南居益旣檄行防護便着該衙門
速撥兵壯前去并沿河有司軍衛畫地分守各與
嚴飭該部知道欽此又該巡倉御史羅萬爵題爲
虜警猝聞凍糧可慮等事奉

聖旨務津剝糧防護督臣議已有旨通州給軍進倉

一併酌覆該部知道欽此又該巡漕御史龔一程
題爲緊急夷情事奉

聖旨兵部昨發兵三千協護漕船已有旨河水未堅
著各該總督率官旗住泊東岸漕船盡斂西岸附
近通倉者酌運入城南居益潘士遴龔一程協心
料理仍檄霸州天津二道分畫信地各帶防兵前
來防護無得疎虞該部知道欽此又該本部題爲
虜情孔棘警報狎聞等事奉

聖旨覽奏卿拮据籌餉知道了授餉軍犒護送事宜

樞臣熟議酌行務期萬全外解在途的差官速催
仍著地方有司多發兵役防送漕船昨有旨收斂
西岸這奏退回津門孰爲穩當部廳倉漕各官隨
宜措置陸運急並施行該部知道欽此俱案呈到
部該臣等看得漕糧爲三軍命脉

京師根本所係安危甚重也邇來歲運愆期漕糧
阻凍其已入京通者曾未及半餘方鱗次江干
聽候剝運不料虜警猝聞倉卒無計臣再四躊
蹰徬徨無策前曾具疏請查漕舟在務關上下

者督令退回天津蓋三日前風和氣煖河水稍
泮臣惴惴焉爲資益糧之恐不得已而議出於
此乃連日感發之聲寒膠欲折臣前議又成盡
餅矣欲循倉臣之議陸運入通但聞潮縣以下
水路七十里內俱無漕船離通頗遠頃據通糧
廳郎中丁流芳揭報虜報倉皇通州戒嚴頭畜
車輛無人應募則陸運之難也又如漕臣疏所
奉

明旨以漕船盡泊西岸官兵防護者盡列東岸禁虜

騎之徑渡防漕事之疎虞似爲至便所可慮者
河水旣堅防護更難數千漕艘終屬難保亦非
策之得也夫此鱗次江干者不知竭東南多少
民力厯

皇上多少申飭費大小臣工多少拮据乃得至此一
且置之若棄非計也我棄之待賊取之尤非計
也爲目下權宜之計則莫如就近收斂一法
查近河州縣地方自通州而下則有涿縣有河
西務關有武清縣再越一百一十里卽津關矣

如近潮縣者卽起貯潮縣近務關者卽起貯務
關近武清者卽起貯武清待事平日仍行剝入
京通其附近天津者盡數截留津門抵作春運
截漕亦不必拘定三十三萬之數其多截者進
於明歲截糧銷算則顆粒悉入倉庾無暴露拋
棄之虞計莫善於此者惟是轉運事務重大頭
緒多端以平常無事之時多官督理猶未易辦
而況事出創舉人情恍惚則尤難之難者安得
無法而處此天津截留素有舊規凡近津者聽

餉臣同該司道商確星夜搬運儘力截留仍照
水次遠近措處腳價臣部一一認之此外無煩
更議矣其官旗交納各縣者旣無統屬之權反
起爭執之端是求速而反遲也臣於司屬中揀
平日之有心計有膽畧有才望及曾習簿書會
計如福建司主事孫士髦宜委往武清縣監運
如山東司主事喻思慥宜委往灤縣務關監運
聽到彼處督同該縣搬運漕糧在務關者仍會
同管關主事劉孔敬該縣佐貳一聽委用車脚

不備則縣官事軍旗不肅則司官事若軍旗有
乘機作弊怠緩從事者輕則照軍令責治重則
叅奏以抗

旨論罪則法無旁撓而事可驟集是則司官之督理
當定也又查各縣近河干者如灤縣不過五里
務關逼近河岸武清距河三十餘里至楊村等
處去縣則又遠矣漕規運價酌道里遠近舊有
定例惟是各縣車驢置袋原非素辦若大通橋
通廳務關車驢經紀有可移易者不妨通融

事餘令該縣雇覓不妨量派里甲或於定例之外每石量加二釐用示鼓舞之術俾人爭趨事而小民子來其在務關卽於該關額課內動支其在該縣不拘何項錢糧便宜支用異時俱於輕賚項下開銷是則入倉之運價當定也又查舊規漕糧入倉正兌每石加二斗五升改兌每石加一斗七升除正改尖耗外凡晒揚折耗皆取足此內今一入倉則此後多寡皆責成該縣與官旗無與焉若無定規倘有折損誰任其咎

似當比照入京通例量各寬免五升正兌加三斗改兌加一斗二升照例斛入不許高下免其晒揚按正改加數內有不足者卽係官旗掛欠該司官具文報部并倉場等衙門稽查追比如照數完足者照例給與印信通關卽匆忙中可免逋負是則入倉之加數當定也近河各縣一城之內大者或數千家少者僅數百家今城中屯糧數多干係重大此寥寥數人詎能防守乎及查運船軍旗每船十人通計頗夥如某運軍

糧入某縣則運官卽於本船分五人守船五人
護糧結隊防守待虜退日方准駕船回空至各
縣官仍再團練鄉兵有警據埤防守是則軍民
之分防當定也司官只能查糧數之多寡完欠
縣官只能督小民之設法推輓倘有刁軍悍民
泄泄從事官司束手坐聽又何益於緩急之教
乎仍祈

勅令總督倉場及巡漕巡倉御史督同漕儲道及通
糧廳申飭分派緝近及遠務令刻期入倉至於

運總運官督率精壯人役晝夜護送防其偷盜
果能依期入倉事平之日文武官員各以有功
軍興照例叙錄其督運兩司官仍與照邊功減
俸優陞有怠玩者繩以

功令又或一關兩縣有殷實好義之民願將騾牛
車輛運米入城者除照例給腳價外仍題給冠
帶優免以旌其勞是則督運之賞罰當定也凡
此皆萬不得已之計也我

皇上赫赫威靈諸臣桓桓武勇窮虜狡寇當爲

之魚旦夕就殲似不必爲此不必然之慮然而
有備無患先事預防從此回空者得以揚帆南
下目前無露國之患明歲免漕阻之虞矣倘或
虜情緊急道路遠遠一時難促入城姑聽權宜
設法或行寄頓或行收藏期於不爲盜資亦非
失算此則臣區區犬馬設法於無設法之一端
也萬一徼

皇上如天之福捷音旦暮報至則臣言又爲贅談矣
伏乞

勅下臣部速差司官星夜監收各縣并天津等處漕糧畫地分運仍令督部及倉漕御史加意料理庶漕糧可保無虞而仰慰

聖懷於萬一矣臣等可任惶悚戰慄之至

崇禎二年十一月初五日具

題本月初六日奉

聖旨漕糧入通已有旨漕縣武清各委司官分督該縣正官搬運入城近津盡數截抵春運來歲銷算總督及漕倉御史責成各司道分催派運仍三日

一奏報其運價加數分防賞罰等事俱依議飭行
該衙門知道欽此

題請收斂凍阻邊糧疏

題爲邊糧凍阻沿河分頭收斂宜亟懇乞

聖明申飭搬運以保萬全事雲南清吏司案呈本月
初七日奉本部送據密雲糧儲主事孫止孝呈
稱本鎮漕糧十五萬餘石舊例分爲四運第三
運泓船未及抵廠凍阻河漕齊連羅山泉河四
季等屯牛欄山等處者二百八十九隻業經循
例調取懷柔順義密雲三縣驢頭就近駄運進
城間隨據順義等縣回稱鄉民避虜逃無子遺

在城寥寥士庶盡無頭畜當此夷情洶洶之際
勢難遵行等情申覆前來據此看得漕糧邊儲
重務全鎮之命脉繫焉今查三運泓船凍阻沿
河者二百八十九隻計米二萬八千九百石置
之河干卽在平時尚需巡緝而况夷氛狂熾之
日乎支放不及收聚無法錢穀之司無兵馬之
權且疾呼不應勢不行於有司伏祈奉部俯念
漕糧邊儲重務特准移咨總督軍門或撥兵防
守或檄催州縣馱運庶軍實充而無資盜之虞

矣等因到部除一面移咨密雲總督速檄懷柔
順義密雲三縣各撥騾驢馱運及撥官兵防護
外事干軍儲重務仍應具題案呈到部該臣等
看得漕糧一十五萬密雲三軍藉爲續命之膏
除二運業已入倉而三運泓船未及抵厥凍阻
河干者計二百八十九隻約糧二萬八千餘石
忽聞虜警轉輸無及與其委之河干聽奸民之
偷盜資狡賊之賫糧莫若斂入倉廩則顆粒皆
珠玉也查河漕距密雲僅十里齊連二十里羅

山三十里泉河三十五里四季四十里此俱當
運入密雲者牛欄山距順義二十里此當運入
順義者附近收斂爲計最便乃密雲餉司孫止
孝移檄懷柔順義密雲三縣責令轉運而三縣
回稱鄉民避虜車輛頭畜難覓不能遵行臣方
憂通州以下凍阻漕糧而今又添邊糧一愁矣
但該縣素無額設運價豈恐動支庫銀後來銷
算抵補之難乎夫邊糧皆有額設運價在輕賁
內若各縣將庫貯不拘何項銀兩動支招徠車

驢等戶星夜搬運分貯密雲順義二縣督同運
官收入倉廩所用運價俟糧完日卽於輕資銀
內照數抵補又該鎮各軍應支月米先於水次
盡數支領所省腳價亦可抵充此項銀兩不過
一轉手間耳如各軍應援無暇又或車輛頭畜
果是難覓聞密雲一帶運糧俱係小河河水旣
堅冰車可以負重致遠尤爲便計所當速行轉
運者也倘各縣泄泄從事漫不經心聽其暴露
於野棄糧於賊卽繩以白簡又何詞焉當此空

悠之秋事屬權宜上下急公應有同情若餉司疾呼而州縣不應亦何得辭其責也糧運緊急勢不容緩既經餉司詳請前來相應題

請恭候

命下臣部移咨總督衙門及劄行餉司責令懷柔順義密雲三縣速行分派設法搬運限文到三口內竣事無致疎虞自取罪戾一體遵奉施行

崇禎二年十一月初十日具

題本月十一日奉

聖旨邊糧軍命所係這三運凍阻的懷柔等縣各設
法搬運入倉限文到三日內完若有延緩該部卽
行叅處運價該縣設處着於輕齎銀內抵補各如
議行欽此

題覆毛御史運糧急着疏

題爲敬陳運糧急着以取

聖裁事雲南清吏司案呈本月初十日奉本部送戶科抄出雲南道監察御史毛羽健題前事奉

聖旨露糧陸運入京及就近各縣入城已各有旨仍行督催這奏招徠在京小車驢脚派發石窩各項大車并居民自願往運各取保結給票馱載及饒京水牀剝運一切事宜該部卽同毛羽健等酌妥速行通糧入倉的嚴行防護外不必議運該衙門

知道欽此又該巡倉御史羅萬爵揭爲虜情緊急
軍儲命脉所關謹再陳急着以濟時艱事條議
搬運凍糧入京六款一議用冰車二議用木車
三議分三七脚價四議用布袋五議運薊邊六
議運到收數等因到部送司相應具題案呈到
部該臣等看得寇逼門庭東糧堪憂臣部於倥
偬之時爲權宜之計題差司官督同附近縣
收領囤貯業奉有

俞旨星夜搬運矣臣猶蒿目腐心謂時當倉猝

創舉轉運艱難恐未能一一奏手不料臺臣毛羽健憂時畫策有運糧急着之疏也恭承

明旨令臣部與毛羽健酌妥速行而倉臣羅萬爵臺臣饒京先後疏揭議論如出一轍夫事求可而功求成又何敢各執已見乎今漕糧之近通州者自灤縣以上盡運入倉矣務關以下附近武清者仍責令司官孫士髦同該縣設法轉輸附近天津者聽其截留矣惟灤縣以至務關上下糧船鱗次河干去通不遠寇至盡爲盜糧萬分

可虞所有目前應急之着惟是招集軍民分運
一法查工部則有大石窩琉璃廠黑窯廠運磚
石車戶在五城則有米車水車驢騾脚夫等役
在臣部則有大通橋車驢戶如各願赴轉運者
於各該管衙門投遞連名保結或十人共一結
或三五十人共一結取具的當保認俱印送臣
部着雲南司照結姓名給於支票一紙編定號
數情願運若干石卽於票上填註前赴水次支
領將支票繳監督主事喻思慥存驗另給運票

一紙填註應領漕船幫次漕糧數目及應納在京倉口開載明白以憑支領交納其支票運票俱斟酌停妥預行刊刻刷印以便應用至京城內外各門亦應各貯五六百石以備城守行糧之用或運某門亦卽明註信地糧數用印鈐蓋庶免偷盜之弊查驗恩慥未有印信現署大壩關防卽可通用要在登記明晰以便銷算其運官發糧者或用私記圖書爲號亦無不可然而分頭支領又非一手一目之力所能兼也查務

關主事劉孔敬、匱運主事林弘衍各可分地督理小民隨到隨領毋令守候其有不足卽潮縣正佐官員及各幫運總各宜効力不容坐視庶分任其勞而事自易辦矣然而代運脚米又不可不酌議也凍糧所在近者在潮縣遠者在務關上下如槩以每石加三斗人咸樂趨近而誰肯赴遠乎今酌定在潮縣者每石給脚米二斗以下則每十里給米四升至四斗而止着該管官斟酌道里親筆填註增減數目如運一石者

脚米須在正數之外朝至夕發當不疾而速
至如大通橋車驢等戶雖係在官人役或願
覓頭畜車輛轉運入倉亦照此例給米卽有
前透支官銀姑與酌量扣抵三分之一餘盡
發亦鼓舞之一端也此外事之最便最捷者
無如臺臣饒京所議冰牀矣河凍冰堅承載
頗多卽着京通二廳取各倉木植各做冰牀
數百面不拘何項人役有欲推輓轉運者
給票領運悉如前法其在漕船軍旗人數
亦多有欲自行

運者亦聽其便俱運至大通橋交卸較之陸運
爲力稍易但仍須大通橋官役用力搬運視爲
募車輛頭畜徑運大倉者尚隔一層宜減腳價
三分之一庶勞半而功倍費省而事集又確乎
可行者也夫小民趨利如驚喜於速交而憚於
稽遲凡運入各倉與各門者各倉監督與派定
各門司官隨到隨收免其守候晒揚寧以我候
彼勿令彼候我其漕船軍旗自運者卽於大通
橋交明亦免入倉晒揚如有插和偷盜等弊

究爲首罰追脚價懲一自可警百一以急公
以足民斯上下兩利之道也抑臣更有推廣之
說焉查京軍三大管及錦衣衛監局匠役等項
月支倉糧不下二十萬石若每人預支四月之
糧則頃刻可運凍糧八十餘萬矣目今城守戒
嚴各軍固自無暇赴領近日通倉領糧尚猶難
之况水次乎第各軍未始無親屬子弟之可代
者也卽親屬子弟不願往者又未始不可以轉
鬻也如近者加脚米二斗遠者遞加至三斗而

止人有不欣欣願往者乎所望總協衙門激勸督發仍令臣部下糧廳多給印信號票每軍每月一紙以便支領轉鬻其不願支領者異日將原票徵還仍許補支倉糧則有益於

國而無厲於軍誠便計也至錦衣衛局監匠役原無事事照常預支一朝而得四月之糧而又厚給腳價或亦其所踴躍趨事者乎是在總督倉場及巡倉御史各設法調度巡漕御史就近彈壓務期同舟共濟可耳大都當此用軍之時與

其養民孰若養軍與其加脚米於民孰若加脚
米於軍與其棄有用爲無用孰若化無用爲有
用將見家給人足自樂於用命矣夫運米十萬
卽費脚米三四萬石竭數千里之轉運罄億萬
姓之膏血一旦輕與軍民瓜分臣每一念至不
覺心痛膽墜又復前後打算漕糧舊例正兌則
有加耗二斗五升改兌則有加耗一斗七升入
倉之例卽購買鹽糧亦原有耗米今軍旗交兌
後免其晒揚則一二五一七及原設耗米俱作正

支脚米之費所損正糧庶幾不過十分之三然
事急矣勢迫矣勢切燃眉謀出僉同臣亦不得
不爾而非其本心也伏候

命下臣部亟行出示曉諭廣爲招徠仍請

勅令在事諸臣同心協力設法支運先軍後民刻期
必行

國儲幸甚臣愚幸甚

崇禎二年十一月十二日具

題本月十三日奉

聖旨車運米牀等議既商酌可用卽便招徠速行如
脚米不願本色者折給銀錢或量行增益仍坐割
司官分頭料理不得泄泄從事軍匠預支四箇月
糧票聽自取鬻願者卽行給與該衙門知道欽此

題正月分月糧仍放京倉疏

題爲官軍月糧事雲南清吏司案呈准下糧廳付
稱崇禎三年正月分官軍月糧坐派在邇京通
本折煩爲作速議定卽付過廳以便坐派等因
到司准此查得每年正四七十四箇月例給折
色後因漕折愆期不能按時支放續該前任部
堂題

准通融支給不必拘定月分惟臨期酌時歲之豐歉
庫銀之多寡等因在案今准前因伏候批定或

京或通或折色以便移付下糧廳坐勘等因
呈到部該臣等看得十一二月官軍月糧原額
通倉支放隨以虜警緊急復改京倉今自軍興
以來費用不貲明年正月分糧合當改派通倉
以省京庾之不足第支通則道路尚梗給折則
庫藏一空且城守未竣米價漸騰有不容不仍
放京倉者積貯日耗誠可爲廩廩矣臣部未敢
擅專相應題

請定奪恭候

命下臣部行文各該衙門欽遵施行

崇禎二年十二月十八日具

題本月二十日奉

聖旨這官軍正月分月糧着仍發京倉該衙門知道
欽此

搬運沿河凍糧以保萬全事

題爲沿河凍糧尚多一時搬運未就懇乞

聖明嚴勅部司諸臣從長設法以保萬全事雲南清吏司案呈本月二十三日接到戶科抄出巡按直隸監察御史龔一程具題前事奉

聖旨這凍糧尚多着嚴防速運天津車役稍便應否再行多運准來歲截數或轉發近鎮接濟本色該部科便從長議奏新運亟俟回空龔一程預行料理該衙門知道欽此欽遵抄出到部送司案呈到

部該臣等爲照凍糧二百餘萬萬姓之膏脂三
軍之命脉係焉方羽書告急之初臣議令京營
官軍分班赴運准作預支月餉蓋倣先臣于忠
愬故事也商之總協以爲未便不得已而爲就
近斂入之請委賦役全書主事喻思慥與管大
通橋主事孫士髦協任其事業匝月於茲矣脫
使車騾人夫件件應手何難報竣無柰虜氛日
逼風鶴皆驚村落人民到處竄伏該縣正官料
理城守之不暇何及車輛人夫乎如前喻思慥

所稟僱車無車僱驢無驢權宜設法所濟幾何
卽漕臣疏內據諸臣所報運過七十餘萬想不
知費許多心力乃得有此其未運者固事勢之
不逮非智慮之不周也臣昨聞虜有東行之信
政鯁鯁焉爲凍糧計漕臣此疏可謂先得臣心
之同然者矣臣與科臣解學龍再三商議河西
鄯縣武清三處雖通虜氛豈無空閑多運少運
惟力是視固不容一刻自諉也河西斗大一城
積糧數多防範宜亟是在順天撫按二臣撥兵

護守當早爲之計矣至於天津距賊尚遠車夫頗多更易爲力今督餉部臣崔爾進雖提兵入援而餉道張志芳兵道石聲諧餉司樊維城俱在津門合無令其多備車役併力搬運加倍收貯作爲來歲應截之數計無便於此者再若轉發近鎮接濟本色仰見

睿慮周詳非臣所及目今薊遼之間修防伊始所需本色亦屬不貲若暫儲於津門徐轉輸於嚴塞其於軍興

國計固大有補濟也伏祈

勅下臣部轉行各該衙門務在相度便宜竭蹶以圖
購凍糧不委棄於河干而新運回空亦無濡滯
後時之患矣

崇禎二年十二月二十四日具

題本月二十六日奉

聖旨凍糧速運已有旨通灣近報夷情嚴行防禦天
津督餉飭兵崔爾進着回鎮料理該部知道欽此

題報收斂運過凍糧疏

題爲漕舟凍阻進退無策敬陳就近收斂之法以
防虜患事雲南清吏司案呈案照先該本部題
前事奉

聖旨漕糧入通已有旨鄯縣武清各委司官分督該
縣正官搬運入城近津盡數截抵春運來歲銷算
總督及倉漕御史責成各司分催派運仍三日一
奏報其運價加數分防賞罰等事俱依議飭行該
衙門知道欽此欽遵通行去後除前已題報外今

於本月十四日奉本部送據運收凍糧主事俞
思慥稟稱職蒙劄委監運潮縣河西務關凍糧
因道途梗塞不獲三日一報復自初一日起至
初九日止搬運過入城米九萬一千二百三十
六石五斗二十四日又報初十日起至十八日
止續運過米一十四萬八千五百九十四石五
斗連前共運過入城米三十萬一千二十八石
五斗有奇本月二十四日又奉本部送據主事
孫士髦稟稱本職奉差武清縣收糧向因道路

梗塞揭報難通今覓有膽力守備李從徵徵服具報自十一月十四日起至十二月十四日止共運過入城米二萬七千三百一十六石四斗八升四合各等因到部送司又查得天津運過入城米三十八萬三千六十七石有奇相應一併具題案呈到部該臣等看得今歲凍阻漕糧其附近天津者原題盡數截留津門以充關寧兩歲之運其潮縣以至務關上下者委主事喻思慥近武清者委主事孫士髦各監督附近縣

官撥車運收入城以避奴虜蹂躪之患仍撥

平剝運京通向因虜警緊急車運艱難今據揭
報喻主事運過三十萬一千二十八石五千
主事運過二萬七千三百一十六石四千八
四合天津運過三十八萬三千六十七石通共
運過米七十一萬一千四百一十一石九斗八
升四合當此兵戈之餘頗極竭蹶之力其餘
在督催僨運及嚴飭加謹防護務保無虞以供
儲精誠萬不容緩者也相應遵

旨奏報謹具本題

知

崇禎二年十二月二十五日具

題本月二十六日奉

聖旨張灣近報賊據務關及附近地方保城護糧俱屬緊急便着司道官嚴加防禦通津亦着相機策應不得坐視你部還同兵部差人星速傳諭仍確探情形具奏欽此

題請大集車畜起運凍糧疏

題爲欽奉

聖諭事雲南清吏司案呈崇禎二年十二月二十九日奉

聖諭大集車輛頭畜起運漕糧接濟欽此又該本部具題爲凍糧收斂已多撥兵防守宜急謹據揭

入

告仰乞

聖裁等事奉

聖旨漕糧派兵設防一面集車速運京通二倉酌量
遠近一體行該衙門知道欽此到部送司除派兵
防守移咨兵部查照欽遵外所有集車起運事
宜相應酌議貢成陸運接濟案呈到部該臣等
看得漕運以四百萬爲額年來截留折欠入者
旣如彼其少按籍給領出者又如此其多通庾
固非昔比而在京庾尤甚查去年十一月以前
六倉實在止一百四十餘萬自軍興以來城軍
口糧援兵行糧所費不貲又十一十二兩月應

放通倉者復改京倉是以見在之糧不過七八
十萬僅足兩三月之支而河干凍糧取數反多
前當逆奴充斥之日岌岌不爲我有幸司官踰
思慥孫士髦等搬入寄藏約該七十餘萬又准
津部揭稱截留遼餉三十八萬奏後已踰旬日
或又有續截入津者而河干之儲尚收斂未盡
也酋虜旣退道路漸通臣部方議陸運之法入

告

皇上而赫赫

明綸已先慮及之但陸運之難較與水運不同而水運之役未始不可爲陸運之役查得河西務額設剝船八百隻外河剝船二百隻通惠河新壩至慶豐五閘共剝船三百三十隻而白糧之剝船不與焉此中有船戶有經紀有水脚諸役不下二三千名大通橋車戶十三號又該一百三十餘名而白糧之車戶亦不與焉凡此皆在官應役資脚價以營生者也平昔既有水輓之責此時當效陸輪之計所當一併拘集按糧分派

不論車輛頭畜務期星速償運以實倉庾者也
然非有協力兼併之法則搬運必不神速查往
例一應興作裝載多借附近州縣之太車以應
急而搬運漕糧可不謂急務乎今議近河如武
清雇大車一百輛東安永清各雇五十輛滹縣
二十輛俱文到隨雇隨運附京宛大二縣各雇
大車二十輛五城司坊官各五輛卽勲戚士紳
不妨破格應募以急

王事此外近京如涿州雇大車三十輛定興新城各

二十五輛通州十五輛俱限文到三日內申報
姓名到部通聽該管司官照車給票協同經
等役運載計每車可載三十石如大車不足以
小車補之所運如大車之數則每轉可得萬餘
政

明旨所謂大集車輛速運接濟者也其所需腳價額
給輕賚銀兩舊例每石計十里給銀一分三釐
今照兵火之後飯食草料稍稍騰貴每石量加
五釐以示寬恤如遠道艱難臨時不妨再酌餘

地既屬公事又不賠苦則子來庶乎可望耳如
果輕賫尚未解到臣部仍行中外衙門權宜設
處徐俟補還然非有提綱携領之人則衆力必
不輻輳查河西務屬鈔關主事外河閘壩屬通
糧廳郎中大通橋車戶屬該橋監督主事各經
管務在查照分督正兌運入京倉改兌運入通
倉押運防閑卽責石土二壩委官併各衛所管
運官旗從事依期蚤竣者從優叙錄怠緩失時
者按法議處

功令具在臣部斷不能輕爲假貸也茲除通糧

郎中丁流芳務閑主事劉孔敬本等職掌各有

專司其大通橋主事孫士髦先經題委武清運

糧今應撤回該橋督催車戶轉運入倉其已經

搬運務閑漕縣武清各凍糧俱令喻思慥兼攝

發運俟兵部派兵到日分撥護防星運入京至

於京通二倉各有額數客春因剝運不及將庫

糧剝入通倉者三十餘萬迨十一二兩月應支

通糧又改支京糧三十餘萬今歲支通業有絀

側或不能併派入通而京倉月糧其所係又非
通此倘河水漸漸脚運省力所有務閑及鄭武
二縣已收之糧除正兌額入京倉外合再補撥
數十萬以爲根本續命之膏可也臣等欽奉

明綸已經分頭料理督催轉運仍應具題恭候

勅下臣部行文各該衙門一體欽遵施行

崇禎三年正月初二日具

題本月初三日奉

聖旨軍儲至急這集車運糧等事若待遠募不無延

悞還速行料理立刻舉行一面差人分投各處星
催起運不必候文到部承委各官仍着三日一奏
遲悞以軍法從事欽此

覆總督倉場官買剩糧本折兼支疏

題爲恭報京倉糧米實在之數併酌省直漕糧至
京之期懇乞

聖明嚴限督促以重軍

國大計事雲南清吏司案呈崇禎二年十二月三
十八日奉本部送戶科抄出總督倉場本部尚
書孫居相題前事等因奉

聖旨倉糧關切軍國急需多方儲備這預催漕糧要
定月限着各早允速發灑帶雇運悉如議總巡漕

及省直撫按監兌糧道有司各官通行嚴飭違
者孫居相與該科卽行叅劾俱以失悞軍機論罪
運官剝糧官買軍糧本折兼支一併覆行該部知
道欽此欽遵抄出到部送司查得督部疏開倉糧
匱乏已極京軍僅足三兩月之支計惟預催漕
運酌定省直月限責成撫按羣縣等官蚤允全
完如期盡到及幫船不敷除灑帶外卽用本船
行月糧銀雇船代運照商民脚價公平議給仍
令兵糧道臣親身督船入關

奏報方許南回其違玩者以失悞軍機論罪等項
業已奉有

俞旨通行總漕巡漕及各省直督撫司道遵行矣其
運官剩糧官買軍糧本折兼支二項奉

旨一併覆行相應議覆案呈到部該臣等看得京倉
係軍

國之急需萬姓之命脉今見存止八十萬石僅供
軍糧二三月之支匱乏之虞實可寒心此非有
補濟之術何以救燃眉之急如運官納剩餘米

原有聽其估賣別衛補欠若本倉原無舊欠
其呈詳照出之例今倉庾匱乏若此凡有納剩
者賣之民與賣之官其得價則一卽當用漕折
銀官買貯倉以充儲蓄不宜聽其照出以減入
倉之額也又軍糧每年例放折色兩月後又議
放四月以爲樽節補濟之計無奈外解愆期庫
貯如洗卽兩月尚不湊手安能更循四月之規
以致倉廩益虧亟應措處督臣所議放折之月
不可以本色相代而放本之時亦須以本折兼

支留有餘不盡之藏爲目前濟急之着誠救時
之確論也第查額設漕折每年僅該二十餘萬
兩盡放折色不過僅完兩月之數若必拘於正
項別無變通恐亦終無補濟之實及查近因軍
興有借動漕折銀姑俟外解稍充卽行補還通
融湊辦再放一兩月折色庶本折不致兩匱而
盈虛可茲兼濟矣旣經督臣題奉

明旨下部相應照議覆

請恭候

命下臣部行各該衙門一體欽遵施行

崇禎三年正月十一日具

題本月十四日奉

聖旨運官剩糧官買軍糧本折兼支欽此

題覆收入津城凍糧起運入京疏

題爲再報收入津城漕糧數目事雲南清吏司爲
呈本月初六日奉本部送天津部院崔爾進題
稱前事等因奉

聖旨這漕糧收入津倉并未收的都着速運入京該
衙門知道欽此欽遵抄出到部送司查得津門運
收凍糧七十餘萬應否盡運入京移付新餉司
查議去後今准該司回稱查得預計崇禎三年
糧料預截凍糧已經本部具疏請行天津部院

查漕舟之近津者僅在楊橋以便收斂不致
三十三萬之數今閔寧春運三十三萬或應
留將餘剩漕糧搬運入京蓋時當多事京庾
充以濟緩急等因到司查得京儲空匱已極
望凍糧接濟而閔寧所需之餉又經題明預
凍糧三十三萬以濟春運是京儲與津運並
也今津部所報運收入倉入城者共計七十二
萬四千六百七十四石六斗六升奉

旨速運入京業經移會新節司查議酌留閔寧

三十三萬外餘俱運入京庾酌緩急而議存發
誠便計也相應題請案呈到部該臣等看得漕
糧軍

國命脉例應運入京庾向因遼左軍興每年借發
津運四十五萬而以帶買遼糧抵還去冬原擬
後到漕船有凍阻者聽津門截留三十三萬以
濟春運數止此耳不虞虜騎突入內地勢不得
不多運收入城以爲權宜收斂之計今據津門
奏報運入倉入城者共計七十三萬四千六百

六十四石有零

明旨着令速運入京實我

皇上注念根本重計第今春融冰泮津門海運時不容已合無除例截三十三萬外實長米四十一萬四千六百七十四石六斗六升又薊餉告罄亟當接濟近俱倚重津部又查自津至薊原引運糧水道可行於中再量留二萬石就便運發其餘盡數起運入京庶京儲津運薊餉俱得之矣
既經該司案呈前來相應題

請候

命下臣部行文各該衙門一體欽遵施行

崇禎三年正月十八日具

題本月二十日奉

聖旨 廣入津城漕糧除截濟關寧留供薊餉外餘
俱入運入京關薊現需至急著餉部速與措運不
得誤悞欽此

題京軍二月分支放通糧疏

題爲官軍月糧事雲南清吏司案呈准下糧廳伏
稱照得每年二月分官軍月糧例食通倉粟米
週緣多事或通或京希酌議妥確會覆過廳以
便坐派不致臨期有悞等因到司准此案查每
年二五八臘月舊例支放通倉去年八月因京
倉粟米貯久虞其紅爛給發京粟議於十一月
內補放後因虜警各軍城守不便赴通支領遂
將十二月正放通倉併十一月補放通倉之月

俱改放京倉今二月分月糧例應支給通粟
軍尚在城守欲仍放京倉而京庾匱乏已極值
今虜患稍寧行令各軍更番赴通支領亦屬妥
便合無移咨戎政衙門酌議妥確以便坐派等
因隨該臣部移咨戎政衙門酌議去後今准總
督京營戎政太子太傅襄城伯李守琦總督忠
勇管提督京營司禮監秉筆太監李鳳翔協理
京營戎政兵部尚書閔夢得回稱查每年二五
八十二月舊例俱赴通倉支領去年八月因京

倉粟米貯久虞其紅朽暫放十二月赴通之月
又改京倉今二月又值赴通之期但各軍尚在
城守欲仍放京倉而京倉告匱但虜患雖云稍
息而根據尚未的確驟赴通倉不無荆棘之虞
今議赴通亦係仰體

國儲務期額在五日内放完庶爲妥便等因到部
蒙批查議具題奉此轉送到司案呈到部該臣
等看得支放京軍月糧在京在通原有定例後
因虜警改期良非得已今二月分月糧例應支

領通粟而京管戎政衙門尤以城守爲虞固
繆深長之計第京庾空匱深爲可憂爲根本慮
不得不遵成例仍支通倉獨是當此用軍之時
跋涉遠道止得粟米或非所樂不若暫改粳米
俟三月內事平補放粟米目下虜騎在郊尚未
解散若令更番赴領似亦不妨城守惟劄行通
倉勒令設法速放限五日內刻期盡完自二十
六日起至三十日而止仍藉

明旨申飭以定衆軍之期會以防通倉之延緩庶於

城守倉庾兩有當矣相應題

請恭候

命下臣部行文各該衙門一體欽遵施行

崇禎三年正月二十日具

題本月二十一日奉

聖旨這各軍支通倉二月米糧依議著刻期給完無
悞城守該衙門知道欽此

題覆總漕料理新運挽遲爲速疏

題爲料理新運事雲南清吏司案呈奉本部送該
總督漕運戶部右侍郎兼都察院右僉都御史
李待問題前事奉

聖旨這漕運日遲亟須挽正奏內督押移駐及責任
監兌糧儲等款併奏外未盡事宜着該科集議叅
酌精心設法期於漕務有裨確當速奏漕儲道臣
加銜以任吏部卽與覆行欽此欽遵到部送司案
呈到部除漕儲道臣周鼎加銜以任一節移咨

吏部另覆外又用手本移會戶移煩爲細加酌
議運務如何設法催償方能挽遲爲速并奏內
諸欸及奏外未盡事宜速期確當以便酌覆
後續該戶科都給事中解學龍手本議得

國家定鼎於燕所恃者東南漕運實爲命脉攸關
每年正二月過淮八九月回空犁然

舊制世爲遵守而不意邇年以來遲滯遂至于此此
在承平無事且不可況逆奴犯順戍卒呼庚能
不鯁鯁憂之乃尚可惰弛如昨不思一番整頓

也乎總漕疏內所稱漕道親押回空前往江蘇
僉兌與糧道督押前來巡漕御史巡行浙直隨
事隨糾總漕部院移駐揚州督催而前踰洪始
返重監兌之權勿以贅疣自視責令徐州兵備
會同各處糧道分地駐劄逐程催僉漕道周鼎
加銜久任駕輕就熟以上各款蓋合大家之力
量精神而振昔日之優游玩愒漕事其庶可克
濟乎此外則尚有可得而言者其大弊有二焉
每一旗船行月修艚蓬桅各項錢糧皆關給于

有司而給不依期者有之或坐派之地有名無
實者有之或給放之時扣一扣二者有之旗軍
起運無資只得守候守候不已只得借貸借貸
不已只得脫逃然則日捱一日焉得而不遲也
此弊之一也凡各項錢糧把總則有扣剋矣衛
所官則有扣剋矣旗甲則有扣剋矣皆視爲一
定之規毫無忌憚乃軍伍所得能有幾何且軍
伍盡是烏合亡命一時雇覓而來者或以販賣
而濡滯或以嫖賭而留連欲漕事之速不可得

矣而把總不敢問之衛所官衛所官不敢問之
旗甲旗甲不敢問之軍伍只得忍氣吞聲虛擲
月日扣剋之病自上而下遲緩之病自下而上
蓋慾則不剛亦情勢所必至也此弊之二也如
今須責成總漕巡漕道糧道各官務太張榜
文開陳前弊凡有鬚眉孰肯復甘染指貽羞簞
簋而各官仍躬親給散務期人得實惠若少有
遲緩便以軍法繩之未有不踴躍用命飛輓星
馳者也又總漕疏稱各糧道送至濟寧較于往

時爲稍遠然濟寧而南總漕已回此時巡漕
漕道尚在後而此地距京尚甚遙糧道固以糧
爲事者何必早回以便私圖須逐程催僨送至
天津是亦職掌之應爾者也至於船被賊燬已
經屢奉

明旨着雇覓民船代運一年若各該省直官或借口
無船沿襲往套則違

旨悞漕之罪其孰能逭之等因移會到臣該臣等會
看得漕運之遲人人能言之而挽遲爲速曾不

能行者豈天下事真不可爲哉非有提綱挈領
之人振飭於上則臂指不運非有同心協力之
人拮据於中則照管不周非有委任責成之實
逐節緊湊卽設官分職皆坐送居諸之贅員耳
臣等固腐心於漕事久矣今讀總漕之疏似已
曲中肯綮如謂回空旣畢卽令漕儲道親押運
船往江廣完兌仍與糧道前後督押前來則江
廣水次文武諸臣皆無所容其推諉矣又謂巡
漕駐劄鎮江間於浙直巡行隨事隨糾則浙直

地方無不悚然於繡斧之威靈既玩愒者何所
容之斯又扼要轉樞之一大關鍵也况總漕欲
循舊例移駐揚州且欲躬親漕道之事必竣糧
船入閘踰洪然後返棹則提綱携領同心協力
之術又何以踰此哉至言監兌司官法令不能
加人尤中諸臣膏盲但諸臣雖散曹乎而煌煌
君命曷嘗不尊今後各該監兌務以兌事爲已任倘
有挪掄不率者自當遵

勅奏効移期爲

國集事若猶然以贅疣自視

功令具在臣部當隨而議其後矣總漕又言單例
徐州兵備會同各處糧道分地駐劄黃河一帶
逐程催餉押至臨清如謂臨清稍遠計送濟寧
入關爲當此更隨地關防不但免延挨亦可絕
偷盜合大家之精力振從前之玩愒誠目前最
要著也前總督倉臣孫居相有疏亦曾責各糧
道押運入關似亦與此暗合而科臣且謂濟寧
距淮較遠距京尚遙若使濟寧而南總漕已回

運漕漕道未至誰爲照管而督促者須令糧道
逐程催償直至天津總之推廣前

旨早期竣事而已惟是漕船原不足額而今歲凍阻
河干者又復爲逆虜焚燬數百餘隻若候造完
起運寧不悞事及查總倉前疏原有幫船不敷
卽用本船行月糧銀僱船代運照公平議給腳
價之說今科臣亦有此議所當速行各該水次
預先儲備以供飛輓者也此外行月修脩等錢
糧務令有司依期給散而無使有守候借貸之

虞嚴禁把總運官不許扣剋旗甲致令沿途販賣恣意延推而不敢問要在法令嚴明伸縮得以自繇挽遲爲速當在於此此皆科臣目擊最真指陳最詳蓋卽

明旨所謂未盡事宜也以上諸臣條議似無餘蘊顧力行何如耳旣經總漕具題科臣會議前來相應覆

請恭候

命下臣部行文各該衙門一體欽遵施行

崇禎三年正月二十五日具題本月二十

聖旨這條覆漕事甚晰漕臣移駐及道臣押至天津
永著爲令江廣路遠若待漕道往返親催豈不反
遲今後只著兩省官糧儲官僨兌押送延悞必罪
今歲運船不敷暫許雇代須公平給價旗軍行月
并修艚等銀依期速給不許扣剋需難朕思民間
輸納何嘗不勤只因各地方官漫不加意以致妨
漕病國該部自今通行嚴飭若仍前怠玩酌定重
重法決不姑息欽此

亟催輕賚以救燃眉疏

題爲亟催輕賚以救燃眉事雲南清吏司案呈奉
本部送據坐糧廳郎中丁流芳呈稱蒙本部批
該職廳呈詳題催輕賚銀兩緣緣蒙批該廳卽
查歷年完欠確數以憑酌議具題蒙此除將天
啓五年以前那借輕賚作銅本不開外案查天
啓六年拖欠一十萬兩零天啓七年拖欠十一
萬兩零崇禎元年分秋運幾半陸運方殷查每
年舊例約該輕賚銀四十三萬餘兩除陸續解

到銀十一萬四千四百兩有奇尚欠銀三十萬五千六百有奇爲照輕賚銀兩有司按糧數徵解少解一分則缺一分盤剝之需今各省三年內拖欠五十二萬五千六百兩有奇以致完糧運官守候盤美逗遛在京欠糧運官望眼折抵耽延時日各倉收受糧斛者移取腳價兼之太倉每以不解扣省爲辭然茲淮解不來憑何發解值今逆虜肆毒船袋煨燼急欲造製庫無遺鎡屢奉催運

殷育不啻雷霆之厲職廳溺職之罪誠不可追第各省直孰非王臣悠悠忽忽坐視京庾匱竭而不
一置念當此法弛人玩之時若非具題咨行准
撫備查拖欠省直指名懲處則漕事之壞莫可
救藥矣係于悞漕悞

國事理擬合呈請題催等因到部送司查得輕賚
銀兩單例一欸內開山東漕標銀限在四月准
上輕賚頭運限在五月二運限在六月違限一
月者解官罰俸半年二月者罰俸一年再遲悞

運事者降一級用如有司徵解不前亦要明
聲說聽撫按官叅罰降用遵行在案又查得輕
賚銀兩例繇淮撫催解其節年完欠確數俱在
淮撫屢次咨行查取未經造報且有山東一省
向係徑解通廳者本司無憑查考今通廳開報
止節年所欠之大槩如必求各省直府州縣細
數不免濡遲時日合無先據通廳所報總數具
題一面移咨漕撫查取各省直完欠細數摘名查
叅等因案呈到部該臣等看得輕賚一項例隨

本色徵解越幫前進以爲漕糧剝運及運官完糧之需俱係喫緊無容少緩其稽延遲悞者運官并有司降罰有差單例具在今查天啓六年欠銀十萬兩天啓七年欠銀十一萬兩崇禎元年欠銀三十一萬五千六百餘兩至於崇禎二年又該銀四十餘萬兩全無解發以致庫貯如洗目今水運陸運腳價浩繁兼以船袋多被虜焚急須補造待用不貲皆取給於輕賁延久不解將何措手且完糧運官望眼欲穿抵補奚從

司庫者不能作無米之炊効役者不能爲無
之運疾呼不應遲悞已極若非請

明旨以申飭奉

功令以從事竭蹶解發恐不足救目前之急而竣
漕輓之役也案查崇禎元年臣部題催前項銀
兩責成總漕部院巡漕御史兼管料理如有拖
欠未完照例叅處漕務竣日仍令兩臣自行回
奏務期全完著爲定例奉有

欽依遵行在案今合仍責二臣勒限督催重加申飭

將起解在途者亟催接濟逋欠未完者勒限卅月不拘別項銀兩那解前來以濟急需再有怠玩愆期查照單例從重叅處庶有補濟不則漕事終不可爲矣仍令總漕部院將六年起至崇禎二年止完欠細數造冊報部查考旣經該廳呈詳前來相應題

請恭候

命下臣部行文各該撫按及總漕巡漕衙門一體欽遵施行

崇禎三年正月二十五日具

題本月二十九日奉

聖旨這輕賚銀兩何至崇禎年間拖欠獨多經管官
視國憲爲何如便着總漕巡漕速行嚴催在途的
星馳前來未經起解的勒限星速解發隨查拖欠
各官指名叅奏仍嚴提承行吏書考比總漕巡漕
并該科漫不急公都着回將話來欽此

題覆總漕薦劾漕運官員疏

題爲敬遵從新整飭之

明旨以振漕事之積玩事雲南清吏司案呈崇禎二
年十一月初二日奉本部送戶科抄出總督漕
運提督臣務巡撫鳳陽等處地方兼理海防戶
部右侍郎兼都察院右僉都御史李待問題稱
前事等因奉

聖旨漕船稽遲先縣開兌不早這奏內薦劾各官該
部嚴加查覈違玩的從重議處作新運榜樣不得

狗情姑息該衙門知道欽此欽遵抄出到部送部
卷查先該總督部院具題前奉內閣令旋道准
已九月盡矣一年儘早開辦自來歲以七月爲
期一切責成各糧道及有司官事事緊湊先期
而完者紀錄後期而完者罰極後者以才力不
及調降查照彙奏等因該本部改限六月過淮
覆奉

聖旨漕船稽遲致悞糧運道過淮既定六月須三月
盡數回空方可四月完兌還嚴行督催其降罰紀

錄各官彙奏出江日期併禁罰旗軍等事俱依擬
申飭欽遵通行在案今照崇禎二年起運漕糧該
總漕部院查明各省直船糧兌發遲速分別舉
劾緣蘇會同巡漕漕御史具題前來相應議覆
案呈到部該臣等看得漕運愆期實蘇積玩所
致若非重加整飭分別勸懲何以惕勵將來今
查各省直糧道據報江西右叅議周汝弼湖廣
副使蔣如奇五月而米至儀陸續儀兌告竣程
途較遠載運獨勞有司奉法糧艘爭先委應首

薦以示激勸淮海道右布政胡爾噠楊州道司
使王象晉潁州道右叅議胡沾恩徽安道右布
政王公弼振劄積玩督發如期均應薦揚常鎮
道按察使吳時亮督催本屬漕糧兌發甚早而
署屬上海獨後功過相準似應免議至於浙江
糧道右叅政詹應鵬所屬兌發稽遲奉

旨戴罪督催後又奉

旨降職一級今查本官戴罪之後躬親水次督兌催
行不避怨勞踰月而各船兌發如駛卽海寧缺

糧亦已報竣且任事日淺情似可原應俟糧到
之日另爲開復其府州縣官如江西南昌府知
府彭期生撫州府知府黃應秀吉安府知府馬
之陞贛州府知府沈振龍饒州府知府張有譽
臨江府知府王建忠南昌府同知羅賓王臨江
府通判姜鄰白南康府通判顧允恭撫州府推
官薛振猷吉安府推官洪啓遵臨江府推官金
鼎鉉寧州知州胡如川南昌縣知縣米助國清
江縣知縣梁士濟進賢縣知縣蔣德瑗豐城縣

知縣沈斯棟南城縣知縣馬士驊安福縣知縣
陳昂虞臨川縣知縣張禾金谿縣知縣余鵬翔
廬陵縣知縣程近信泰和縣知縣徐行忠新喻
縣知縣巫子肖新淦縣知縣周文胤峽江縣知
縣關用學安仁縣知縣潘士元奉新縣知縣王
倬然樂平縣知縣蕭穗湖廣荊州府知府胡公
胄承天府知府劉體仁岳州府知府程道行武
昌府同知黃翼登德安府通判任大仰岳州府
通判王台卿武昌府通判羅學伊黃州府通判

姚廸嘉荊州府推官朱邦祈武昌府推官禹好
善隨州知州黃朝選澧州知州王敦德沔陽州
知州黃必演湘潭縣知縣陳文燿蒲圻縣知縣
林增志公安縣知縣高鳳翔黃岡縣知縣吳允
初江陵縣知縣周瑞豹景陵縣知縣楊一雋當
陽縣知縣任鼎咸寧縣知縣劉世科通城縣知
縣朱宗讓雲夢縣知縣龔道洽潛江縣知縣李
自問巴陵縣知縣安汝盤嘉魚縣知縣王來儀
廣濟縣知縣劉俊大冶縣知縣林縉黃梅縣知

縣周獻孝感縣知縣高奇英攸縣知縣王枚

瀏陽縣知縣陳運直隸江南常州府知府石萬

程鎮江府知府陸懷玉寧國府知府黃夢松池

州府知府顧元鏡太平府通判張爾葆常州府

推官劉興秀鎮江府推官周廷鑑寧國府推官

蔡宸恩蘇州府推官王瑞梅太倉州知州劉彥

貴池縣知縣張燦垣宣城縣知縣謝玄珖當塗

縣知縣郭紹儀溧陽縣知縣丁聖時江陰縣知

縣吳鼎泰溧水縣知縣曾就義丹徒縣知縣鄭

之尹無錫縣知縣陳其赤金壇縣知縣劉宗祥
宜興縣知縣李獻廷吳縣知縣陳文瑞華亭縣
知縣鄭友立懷寧縣知縣吳承燧上元縣知縣
何其俠高淳縣知縣莊鐸江浦縣知縣張懋忠
南陵縣知縣周崇極太平縣知縣吳中頴建平
縣知縣唐良錦六合縣知縣蔡如葵寧國縣知
縣陳維泰江北淮安府知府董允升揚州府知
府徐伯徵淮安府通判陶安齡揚州府通判王
經世廬州府推官簡文瑞淮安府推官王用予

無爲州知州李春華通州知州董發惟高縣

知州盧燦山陽縣知縣朱國棟江都縣知縣連

大成舒城縣知縣王觀光泰興縣知縣孟名世

興化縣知縣王績燦廬江縣知縣楊墀巢縣知

縣王惟德沐陽縣知縣程接孟海門縣知縣李

景時浙江臨安縣知縣涂必遷昌化縣知縣吳

士忠新城縣知縣江之遠武康縣知縣章文鼎

於潛縣知縣郭光詹以上各官俱催科盡力完

發如期均當薦揚以示激勸此外如松江府上

海縣知縣陳昌胤六月旣半尚欠米四萬餘石
至推官臨倉比兌纔得苟完浙江安吉州知州
孫幼孜漕米止五千餘石數少而兌遲德清縣
知縣余若麒漕米三萬五千有零稽延而居後
以上三臣催科無法兌發愆期漕運至急猶自
怠緩除陳昌胤余若麒已經議處改降外孫幼
孜仍應降職二級以警其餘俟新運早完方爲
開復海寧縣知縣謝紹芳邑有重災已准半折
乃日久而粒米不備則料理之謂何今雖報有

發運在途仍當戴罪督催令俟糧完之日再爲
酌議湖州府推官胡守恒不能早爲督催致所
屬安吉德清兩州縣允發最遲別縣亦遲法應
罰俸三月示懲至於徐州四縣不在過淮過洪
之內往往恃近反遲及至委官督允方爲告竣
揆期已後查沛縣知縣張信豐縣知縣王體蒙
四縣之中二縣尤遲雖云米久完貯幫船不至
然一日不允一日是縣官之責亦當罰俸三月
以警將來各官罰過月日不准實歷所罰俸銀

解充邊餉既經漕臣具題前來相應覆

請恭候

命下臣部行文各該衙門一體欽遵施行

崇禎三年正月二十五日具

題本月二十八日奉

聖旨是欽此

題報通廳務關燒燬剝船漕糧疏

題爲奴虜燒燬船糧事雲南清吏司案呈正月十七日該本部批據監督河西務鈔關主事劉孔敬呈報前事奉批據報未有船隻確數且船中有糧否亦未說明仍速查再報去後續據該關造報燒燬河剝船隻文冊前來內開有糧重船一百六十五隻無糧空船一百八十三隻共燒燬船三百四十八隻又未明開燒燬糧石數目又據坐糧廳郎中丁流芳冊報被虜燒燬石土

二壩軍白糧外河剝船二百五十三隻半又五
壩普濟等閘裡河剝船一百二十二隻亦未明
開有無燒燬糧米一併覆查去後今據務關主
事劉孔敬揭稱職于未奉之先已經親詣河干
逐一查勘備開冊報去後但糧之多寡船戶有
殺傷者有擄去者有驚散四方者未能遽得確
數今遣役遍地搜覓查明重剝船一百六十五
隻每隻裝米一百五十石共米二萬四千七百
五十石除已卸米二千零六十六石止共計燒

燬米二萬二千六百八十四石又據坐糧廳郎中丁流芳揭稱燒燬河剝重船五十六隻共燒燬米七千三百三十一石又准巡漕御史潘士遴手本開據海防同知王秉衡報稱查過燒燬漕船自張家灣起至王家樓止共九百五十三隻實係空船其楊村上下二百萬漕糧四千隻漕船幸俱無恙各等因在案該本司查得燒燬船糧係干

國計相應具題案呈到部該臣等看得逆奴狂逞

入犯內地擄掠我貨畜屠戮我人民流亡滿道
僵屍橫野其慘有不忍見聞者及至東行又焚
燬我糧艘損壞我軍實兇狡甚矣今據巡漕御
史潘士遴開報燒燬漕船九百五十三隻俱係
空船其楊村上下二百萬漕糧四千隻漕艘俱
各無恙雖窖藏者間有虜馬蹂躪居民竊取然
所耗費不多實賴我

皇上如天之福而畱此軍民續命之膏也又有新開
主事劉孔敬揭報燒燬河剝船三百四十八隻

內重船一百六十五隻燒燬糧二萬二千六百
八十四石其一百八十三隻則空船也又據坐
糧廳郎中丁流芳揭報燒燬軍白糧裡外河剝
船共三百七十五隻半內重船五十六隻燒糧
米七千三百三十一石不在分管信地之內其
一百二十二隻則空船也夫漕糧自數千里遠
來上入剝船卽擬爲倉中之物而乃使三萬一
十五石忽成灰燼可爲痛惜者此也與守之官
收歛不早似難辭其責矣但其始也河水驟合

舟楫無功固以天時之不假易而致剝運之難
終其旣也虜逼人逃車驟難覓又以船丁之孤
子而致收歛之不盡則其情亦若有可原者今
查船戶各役殺擄逃竄之外所有無幾勢難責
之賠償且每船所載未必盡皆一百五十石就
中或有捏報情弊仍俟逐一清查再爲定奪燒
燬船隻臣部已行通廳速爲召募給價補造以
濟運務至于務關通廳剝運漕糧各有分管信
地舊例以里二泗爲界保護無虞乃其本職忽

遭虜賊焚燒實二百餘年稀有之變似難坐以
不職之罪顧時勢雖值其艱而職守無容他緩
不有薄懲何警將來合以信地各別多寡亦懸
量爲分別罰治務關主事劉孔敬應罰俸四箇
月通廳郎中丁流芳姑罰俸二箇月以警其後
目今剝運凍糧星速僨運方賴二官分猷宣力
誠不便苛求者也旣經該司案呈前來相應題
請恭候

命下臣部行文各該衙門一體欽遵施行

崇禎三年正月二十七日具

題二月初二日奉

聖旨潛士遶報燒燬俱係空船兩司官便報燬糧三
萬有餘又詰而後報船數參差該部卽確查情弊
具奏欽此

題議速行水運顧瓦民船疏

題爲續報運過附近城糧遵

旨回奏事雲南清吏司案呈本月二十四日奉本部
送該巡按直隸監察御史潘士遴題前事奉

聖旨這續運過城糧知道了水剝費省增雇民船該
部卽與酌覆欽此欽遵到部送司卷查先該本部
題爲恭報陸運京倉薊鎮漕米事奉

聖旨這運過京薊餉數知道了春融永泮還着水路
並僨以濟急需欽此又該本部題爲再報收入津

城漕糧數目事奉

聖旨這收入津城漕米除截濟關寧留供薊餉外餘俱起運入京關薊現需至急著餉部速與撥運不得緩悞欽此又該本部題爲恭報陸運京倉等事奉

聖旨這運過京薊糧數知道了還著水陸並僨依限奏報薊門軍需宜裕未可議停你們還料理行欽此俱通行欽遵訖又奉本部送據河西務鈔關主事劉孔敬呈爲急濟春運事內稱本關八百

剝船歷來春運東糧尚苦不足遍貼民船協濟
今剝船被燬幾居其半運務又急往時雖差員
役封貼民船然津北民船寥若晨星津南俱聞
虜警思逃河漸一流盡從南走卽欲封貼無舟
可貼本司事權輕若鴻毛州縣恬不介意伏乞
移檄滄州靜海沿河等處責令州縣官羈留民
船不許南還押令赴關協運庶可按期竣事涼
粒早登倉廩等因到部奉批據呈亦屬軍

國急務迫切至情筆南司速飭天津道督行天津

漕州轉海青縣等處羈留民船刺運漕糧照例
給與運費毋得悞事奉此創行天津道及河間
府督行所屬沿河州縣封貼民船速赴務關等
處裝運漕糧去後又奉本部送據坐糧廳郎中
丁流芳呈爲亟催水陸並運凍糧事內稱查得
各運校搬運薊糧自正月十一日起至二十二
日止共運過薊糧九千四百三石五斗通管軍
丁抗運過薊糧二千一百石又通州雇覓車畜
運過薊糧五百二石俱經職廳現給腳價往來

督催赴薊交納通共起運過凍糧一萬二千零五石五斗尚有起運在途未經報到者俟薊州收有的數另報今奉

明旨津糧徑運薊州京糧還着水陸並僸則經紀水脚車船戶原係供水運之役仍應撤回作速修艍剝船預備口袋夫役上緊剝運又時不容緩者也乞速具題等因到部奉批昨奉

明旨勿停薊運然經紀亦脚人等實供水運之役今水運在邇又不得不停也津門薊運已多或不

專藉力於通州矣雲南司查議具題奉此查得
巡漕御史疏

請雇覓民船與通廳務關呈詳俱係剝運漕糧一事
相應併題案呈到部該臣等看得漕糧係軍

國急需其凍阻河干者速宜起運入倉業奉

明旨集車陸運各皆兢兢趨事矣今值春融冰泮水
運亟當舉行蓋陸運之費重而水運之費省也
兼以泥淖滿途車輛不能疾驅是陸運之難又
不如水運之易也第所需剝船每年除額船外

尚多雇貼民船協濟今遭虜變額船燒燬幾半
益屬難支誠恐收斂窖藏之米延遲日久必有
汜爛之虞是雇覓民船之舉誠目前之急著也
雖經臣部檄行天津等道府督各沿河州縣封
貼船隻濟運照例公平給與運價原無虧於小
民自當樂於奔走第恐非奉

明旨申飭則稟承不尊而奉行不速至於薊餉宜裕
輸運自難少緩業奉

俞旨准於津城截留米內着令餉部速爲撥運查有

水道可通便而且捷又通廳已運一萬二千餘石至薊可免呼庚不繼之虞今除昌密兩鎮經紀五十名仍留運料草外其通廳經紀水脚等項原係開壩水運之役今應亟行撤回修船置袋以供本等飛輓庶免遲悞漕事誠不便舍水而陸顧此失彼者也既經漕臣具題及務關通廳呈詳前來相應覆

請恭候

命下臣部行文各該衙門一體欽遵施行

崇禎三年正月二十八日具

題本月三十日奉

聖旨俱依議速行內封貼剝船須公平給價毋得擾
民該部還行嚴飭欽此

題覆巡漕分委押運漕糧疏

題爲新運萬分緊急特陳切要事宜仰祈

聖明立賜

嚴勅事雲南清吏司案呈正月二十四日奉本部送
該巡按直隸監察御史龔一程題稱前事等因
奉

聖旨道臣押糧前已有旨河南山東二省依議親督
抵通運弁須查交糧果完准押空速回旗軍行糧
卽着見給其雇募船隻及通判押運還着確議具

奏該部知道欽此欽遵到部送司查得臨開山東
河南二省糧道親押抵通旗運見給行月糧銀
十三把總押催回空等項已奉

明旨處分已定俱通行欽遵訖至于雇募船隻一項
業該本部會同戶科酌議覆

請外惟是各府管糧通判押運一節相應議覆案呈
到部該臣等看得漕事之遲實累年積玩所致
茲欲挽遲爲速惟在有司早徵糧米軍衛早備
船隻各該司府早給旗軍行月糧銀事事湊手

加之沿河道府州縣各照信地步步催趲又責令各省直糧道躬親押運直至天津方止各遵職守銳意力行何患運事之愆期也至於雇募民船協運事宜尤爲目今急着業該臣部會同科臣酌議具題訖其山東河南二省糧道已奉明旨責令親押抵通無容再計惟是各府管糧通判委押督運原其本職悉令照府分部逐程催儻各隨糧道同爲行止蓋糧米數多船隻先後不齊糧道一身不能遍及而通判分猷効力於下

者自又不容已也漕臣所議誠爲有見今後須
責各省直通判隨同糧道在浙直江廣者押至
天津在山東河南者押至通州方准告回務要
約束下役無得需索漕幫如是則上下同心大
小協力各盡拮据之勞勉圖幹濟之功而後積
習可破飛輓可期有違玩者重加叅處所當通
行申飭者也旣經漕臣具題前來相應覆

請恭候

命下臣部行文各該衙門一體欽遵施行

崇禎三年正月二十八日具

題本月三十日奉

聖旨各省直漕糧既有道臣押運管糧通判不必隨
行該衙門知道欽此

題京營二月草料照新議給折色疏

題爲亟催草料以資軍興事雲南廣西清吏司案
呈奉本部送准協理京營戎政兵部尚書閔夢
得會同總提衙門咨前事煩將十一十二兩月
未發草料作速給散其二月分本色料豆卽便
移會召買施行等因到部准此送司奉此除三
大營十一十二兩月馬匹料草折色銀兩原因
軍興費夥庫藏匱乏業經題奉

欽依俟刻下外解稍裕卽照數補發外所有二月分

應給本色草料一節合行議覆等因案呈到
該臣等看得行間衝突攻取全靠馬兵故必馬
有飽騰之實而後軍無脂朒之患臣部責在軍
需一應草料敢不竭心力以從事但舊日之弊
政既不能相仍而目前之供給又不能卒省其
召買虛實之故尚有可得而言者

京師三大營馬匹二十兩月支給本色料草餘月
俱給折色此舊例也料豆一項京倉從無預儲
舊例召商買辦以應京營二十兩月之需嗣因

各商騙費官銀以數萬計該臣部查實題叅送
刑部擬追議將前項料豆令宛大二縣代買不
謂積商牟利又復改名投充銀已全領豆不半
納使非臣部勒限嚴追又幾成前商之續矣該
臣等無奈於去年夏月與總協議定卽二十兩
月應給本色之月亦以折色抵給又恐軍士不
願查往月每豆一石例給價銀四錢故二月議
加二錢共六錢十月議加一錢共五錢已經移
會京營允覆在卷草束一項在京五場每年額

辦一百五十萬束每年二十兩月支放亦復稱
是比雖營馬倒損數多所放亦近一百一十萬
造支在案每次雖有餘剩客歲商價不敷減買
三分之一則所存者鮮矣五場實在僅有軍興
援兵草各三十萬束耳邇者奴賊猖狂援兵四
集日用料豆不下千石臣部不惜高價收買又
題奉

明旨令五城代買然亦僅足供應并無顆粒存積近
且奉

聖諭派行省直買解矣援兵日用馬草不下三四萬
束臣部按數運交尚有斤兩稍輕者仍復照秤
折補共已支草八十萬所存軍援草束僅七十
萬於是五場之堆垛者岌岌乎有空虛之虞矣
若京軍一月便該支豆一萬七千四百餘石支
草五十三萬二千餘束不但料豆之召買一時
未必應手卽見在之草束亦安得不少存有餘
不盡以備不必然之過慮乎况城外列營京軍
行糧見支本色每馬每日料三升草一束已足

用矣城內城守京軍行糧亦見支折色每馬每日料草通共折銀三分五釐亦不爲不厚矣所有二月分料草似應循例改折令各軍自辦如謂馬匹貴壯但將應給價值不妨另議增加如料豆舊例四錢新例六錢今照時值每石給銀九錢草束舊例每月三十束折銀五錢每束止折銀一分六釐六毫零今照時值每束給銀二分三十束給銀六錢價值既厚買辦無難異日事寧不得引以爲例斯亦情法之平而官與軍

兩便之道也夫草料爲軍馬急需之物豈臣部
不能辦而各軍反能自辦者蓋緣臣部數處其
合以一時而取給則慮不敷各軍數處其分以
衆人而各爲營以三十日而徐爲辦則無不足
又理勢之固然而無容再計者也旣經總提協
衙門咨催前來合無據實控籲取自

聖裁將二月分應支草料准照新議價值發給折色
庶芻秣不乏而倉場亦有攸賴矣

崇禎三年正月二十九日具

題二月初三日奉

聖旨是欽此

題覆總漕補造漕船以濟新運疏

題爲漕事所急在船補缺時不容緩伏乞

嚴爲責成以濟新運事雲南清吏司案呈崇禎三年
正月十三日奉本部送該總漕部院李待問題
前事奉

聖旨這補造運船僉旗責該道修造責分司南京各
衛責京府推官都着申飭行無開額價如何欠至
二十餘萬查議具奏借用木價着補還以濟急用
該衙門知道欽此欽遵到部除僉補旗甲責該道

修造運船責清江分司南京各衛責京府推官
及荊州府借欠木價着補還以濟急用等項俱
行文各該衙門欽遵外惟蕪關欠造船額價銀
二十餘萬奉

旨查議具奏欽遵移咨工部查議去後今奉本部送
准該部咨覆前事內稱以後仍責該關按季解
淮差滿查其完欠以爲殿最等因到部送司相
應議覆案呈到部該臣等看得漕事之所急者
惟運船爲第一義今船多缺額補造不能如數

卽有糧而無船何以克濟運事查清江廠每年額造糧船五百四十八隻料價銀兩皆取給於杭蕪二鈔關稅銀在杭關派銀一萬四千四百四十兩在蕪關派銀一萬八千七百七十兩每年共銀三萬三千二百一十兩解廠以供物料之需杭關每年完解無欠惟蕪關止天啓七年全完外其餘節年拖欠自天啓元年起至崇禎二年止共欠銀二十一萬有奇所云積欠二十餘萬者自萬曆四十三年以後所欠總計之數

也蓋因銀在南部時當庫訕不惟呼之不應且那借別用故積欠如此之多是以總漕部擬有徑解淮庫之請業經工部議令按季解淮以濟急需每年該廠司官將用過銀兩造過船隻造冊

奏繳遇有贏餘報部咨解南部應用管關官差滿查其所解完欠以爲殿最其歷年拖欠者設法陸續補還題奉

依在案此崇禎二年二月內事可責速爲完之要

法也今查去歲過淮缺船該廠應造七百隻今又被虜燒燬數近千隻所費浩繁待用甚急恐該關不得如前膜外視之也今除當年一萬八千七百七十兩應責該關速行按季全解外其遠年積欠者姑俟再議但將天啓元年起至今止欠銀一十一萬餘兩仍令南工部督同該關分作三年補完以濟急需如舊逋不解新稅不給該廠何能作無米之炊造船豈能爲點金之術其悞漕事之大莫甚於此斯何時也而可悠

忽延緩漫不經心乎以後解銀不如額者該
司官查叅重處治以違悞之罪其南工部承行
司官亦宜併究既經總漕具題及工部咨覆前
來相應覆

請恭候

命下臣部行文工部總漕及南京工部并劄蕪關一
體欽遵施行

崇禎三年正月二十九日具

九二月初四日奉

聖旨運船補造料價急需無開額解并近年積逋都
着勒限督完毋致延悞各該衙門通行申飭欽此

題報龔潛院原疏開會稽遲疏

題爲新運緊急押運無官萬難姑待懇乞

聖明亟賜

宸斷以濟然眉事雲南清吏司案呈二月初七日該

本部送奉

御前發下巡按直隸監察御史龔一程題前事等因
奉

聖旨運弁交糧果完方准速回前已有旨這秦內把
總該部查係領運不係交糧卽督令速押回空不

許刻延龔一程前疏已經批發何云尚未奉旨
運要務豈無關會中間何故稽悞着查明具奏該
部知道欽此到部送司查得正月二十四日該本
部送奉

御前發下巡漕龔御史題爲新運萬分緊急特陳切
要事宜仰祈

聖明立賜

嚴勅事奉

聖旨道臣押糧前已有旨河南山東二省依議親督

抵通運弁須查交糧果完准押空速回旗軍行糧
卽着見給其雇募船隻及通判押運着確議具奏
該部知道欽此到部送司查得各府通判一節相
應議覆呈堂於二十八日具覆訖三十日晚奉
御前發下原疏奉

聖旨各省直漕糧既有道臣押運管糧通判不必隨
行該衙門知道欽此於二月初一日抄送到司隨
於初二初三兩日通行總漕部院總督倉場浙
江江西湖廣應天山東河南六省巡撫都察院

轉行巡漕及各該巡按御史并漕儲道六省直
監允訖本司竭蹶奉行無敢稽悞祇緣本部與
巡漕御史文移往來例繇都察院轉行又因夷
氛未靖章奏不敢發抄且巡漕龔御史遠在津
門是以不及知耳今奉

明旨着查明具奏理合具覆案呈到部該臣等看得
章奏布聞中外漕運事關軍

國不宜少延旦夕查漕臣龔一程新運萬分緊急
一疏原于正月十七日具題二十四日奉

旨下部二十八日臣部具覆嗣奉

新綸於二月初一日發司初二初三兩日通行總漕

部院等十六處合于衙門訖漕臣本擬原疏隨

上隨下不意中間又經部覆未免稽延時日及奉

旨通行又繇都察院轉折而達查漕臣催疏發於二

月初三日適當臣部移文一二日間故未及通

到耳除漕臣奏

請十三把總速押回空當卽行文各該衙門欽遵外
既經該司查明前來相應具覆伏乞

聖明裁察施行

崇禎三年二月初八日具

題本月初十日奉

聖旨事閑漕務時刻難緩龔一程前疏既經奉旨如
何姑待再覆方行移會以後還加嚴飭該部院知
道欽此